

## ETH CATALAN E ES LENGÜES DITES “MINORITÀRIES” DERA UNION EUROPEÀ

---

**Ena Union Europèa i a trenta-sies lengües “regionaus o minoritàries” e les parlen mès de vint milions de persones**

Eth continent europèu e es Isles Britaniques an viscut innombrosi cambis de frontères, annexions de territòris e moviments de poblacion ath long dera sua istòria. Ua des resultes a estat que lèu toti es estats siguen plurilingües.

Laguens deth territòri dera Euròpa des quinze i a, segontes er informe Euromosaic, encomanat pera UE, trenta-sies lengües dites “regionaus o minoritàries”, despartides en cinquanta-nau grops lingüistics damb desparièrs grads de reconeishença juridica e sociau. Cap d’eri non gaudís de plea oficialitat reconeishuda a nivèu estatau.

Ena Union Europèa, mès de 20 milions de persones parlen ua d’aquestes lengües, ath delà dera oficiau der estat deth quau an era ciutadanetat. Lèu lèu eth 50% viu en Espanha e eth 23% en França. Era rèsta ac hè principaument en Irlanda, Itàlia e es Païsi Baishi.

**Sonque sies lengües “minoritàries” supèren eth milion de parlants**

Des 36 lengües dites “minoritàries”, sonque 6 despassen eth milion de persones que les parlen (tau com mòstre era taula 5). N’i a dues que supèren eth miei milion (basc e gallés), en tot que 6 mès despassen es 125.000 persones que les saben parlar sense arribar ath miei milion (frison, friülan, luxemborgés, finés, breton e còrs).

**Eth catalan ei era lengua mès nombrosa respècte des lengües dites “regionaus o minoritàries” dera Union Europèa**

Eth catalan ei era lengua mès nombrosa, entad açò qu’ei ath nombre de persones que la parlen, en repòrt damb totes es que se diden “regionaus o minoritàries” ena Union Europèa, e qu’ei era unica que saben parlar mès de 7 milions de persones.

Per motius istorics e politics, eth catalan s’includís abituaument en aguest grop de lengües maugrat qu’era sua realitat ei plan luenh dera de totes es autes, per demografia, estatut juridic, situacion sòcio-lingüistica e normativa lingüistica.

Era taula 5 presente eth catalan en repòrt damb es lengües “regionaus e minoritàries” qu’an mès de miei milion de parlants.


**Taula 5. Parlants de catalan e parlants de quauques lengües “minoritàries”**

LENGUA	PARLANTS	ESTATS
<b>Catalan</b>	<b>7.200.000</b>	Espanha, França, Itàlia, Andòrra
Galhèc	2.420.000	Espanha
Aleman <sup>(1)</sup>	2.220.000	França, Itàlia, Belgica
Occitan	2.100.000	Espanha, França, Itàlia
Sard	1.300.000	Itàlia
Irlandés	1.240.000	Reiaume Unit, Irlanda
Basc	683.000	Espanha, França
Gallés	508.000	Reiaume Unit

Hònt: IDESCAT. Estudi EUROMOSAIC.

<sup>(1)</sup> Er aleman qu’ei era lengua damb mès parlants dera UE: en totau 92.420.000 parlants. Dehòra d’Alemanha e Àustria a era consideracion de lengua minoritària

Eth mapa següent presente es catorze lengües “minoritàries” dera Union Europèa qu’an mès de 125.000 parlants. D’aguestes, n’i a tres que subergessen peth grad de modernizacion e era maduretad dera economia deth territòri a on son presents: eth catalan, eth basc e eth luxemborgés.



*Sonque 6 des nomentades “lengües minoritàries” supèren eth miei milion de parlants. Per dessus d’aguestes 6, eth catalan compde damb mès de 7 milions*

Hònts: Euromosaic. Elaboracion pròpria a partir dera Estadística Oficial de Poblacion de 1996.